

29. zasjedanje Parlamentarne skupštine Frankofonije za regiju Evropa

Vallée d'Aoste, od 26. do 30. septembra 2016.

REZOLUCIJA

Ekonomska frankofonija – njena regionalna integracija

Uzimajući u obzir važnost ekonomskog potencijala frankofonije čiji se prostor ne proteže samo na frankofonske nego i na frankofilske države;

Uzimajući u obzir frankofonski ekonomski prostor kao privilegirani prostor za razmjenu i saradnju koji olakšava regionalnu integraciju i time i uključivanje u međunarodnu razmjenu;

Uzimajući u obzir da u tom regionalnom prostoru treba valorizirati ne samo učenje nego i korištenje francuskog jezika kako bi on postao radni, ekonomski i poduzetnički jezik;

Uzimajući u obzir da razvoj pozitivne i inkluzivne ekonomske frankofonije zapravo doprinosi trajnom i odgovornom razvoju čovječanstva jer predstavlja viziju kojom se u središte tog procesa postavlja razvoj pojedinca;

Primajući k znanju Ekonomsku strategiju za Frankofoniju i Deklaraciju koju su u Dakaru, na 15. samitu Frankofonije, usvojili šefovi država i vlada koje povezuje francuski jezik;

Naglašavajući posebno angažman frankofonije na podsticanju stvaranja okruženja pogodnog za rast i investiranje te komercijalne aktivnosti s jedne strane, i na jačanju uključivanja mladih s druge strane;

Parlamentarna skupština Frankofonije za regiju Evropa, na 29. zasjedanju u Vallée d'Aosti,

traži od Parlamentarne skupštine Frankofonije

- da ojača ili uspostavi veze s međunarodnim ekonomskim organizacijama i da zaključi okvirni sporazum s Frankofonskim forumom za poslovanje kako bi učestvovala u stvaranju prave poslovne mreže i da paralelno jačaju osjećaj pripadnosti frankofonskom prostoru;

traži od Međunarodne organizacije Frankofonije

- da da svoju podršku regionalnoj saradnji i integraciji s ciljem uspostavljanja dinamičnog partnerstva među preduzećima sa sjevera kako bi se podstakla razmjena između sjevera i juga u duhu povjerenja i uzajamnog poštivanja;

- da intenzivira svoje djelovanje u korist ljudskih potencijala kako bi se promoviralo obrazovanje u oblastima ekonomije, istraživanja, industrijske i poljoprivredne proizvodnje – uključujući i spašavanje i mobilnost preduzeća u okviru frankofonskog ekonomskog prostora – trgovine, poduzetništva kroz najšire moguće korištenje novih informacionih i komunikacionih tehnologija, te da prati države i vlade država članica u oblasti poduzetništva mladih i žena kao i u stručnom i tehničkom obrazovanju;
- da uspostavi digitalnu platformu koja bi objedinila studente koji su studirali na francuskom jeziku ili one koji su učili francuski kao strani jezik kako bi se time podstakli susreti mladih govornika francuskog jezika koji su stručnjaci u svojim oblastima i frankofilskih i frankofonskih preduzeća koji traže partnerstva;
- da intenzivira saradnju s Frankofonskim forumom za poslovanje (FFA);
- da promovira, naročito u partnerstvu s evropskim institucijama, oznaku „frankofonsko preduzeće“ na osnovu frankofonske povelje Frankofonskog foruma za poslovanje i da kontrolira usklađivanje pravnih okvira koji doprinose osiguravanju investicija i trgovinskih odnosa i stvaranju pravnog okvira pogodnog za poslovanje;
- da ispita mogućnosti uspostavljanja frankofonske ekonomske unije prilagođene evropskom prostoru vodeći računa o zahtjevima homogenih ili komplementarnih teritorija;

angažira se, naročito tokom dana Frankofonije, da uradi sve s ciljem provođenja ekonomske strategije Frankofonije, koristeći, ako je to potrebno, fondove dostupne u akcionom programu za saradnju u regiji Evropa.